



Achunguzaye kwa Unyenyekevu

Atajifunza

Ee Bwana, unijulishe njia zako, Unifundishe mapito yako.—**Zaburi 25:4.**

Ufunuo sio uumbaji au uvumbuzi wa kitu kipya, bali ni uoneshaji wa kile ambacho, mpaka kinafunuliwa, kilikuwa hakifahamiki kwa wanadamu. Kweli kuu na za milele zilizopo kwenye injili zinafunuliwa kwa njia ya uchunguzi wa bidii na kujinyenyesha wenyewe mbele za Mungu. Tunaye Mwalimu wa mbinguni ambaye anaiongoza akili ya mchunguzi wa ukweli mnyenyekevu; na kwa uongozi wa Roho Mtakatifu, kweli za Neno zinafunuliwa kwake. Na hakuwezi kuwa na maarifa ya uhakika na yenye ufanisi zaidi ya ukweli kuliko kuongozwa hivi katika ukweli wote. Kupitia kutolewa kwa Roho Mtakatifu tunapaswa kuelewa Neno la Mungu. Tunaaswa kuutafuta ukweli kana kwamba tunafuta hazina iliyositirika.

Bwana anafungua uelewa wa mtafutaji wa kweli. Roho Mtakatifu anaiwezesha akili ya mwanadamu kung'amua kweli za ufunuo, na nuru ya Mungu huwasiliana na nafsi. Huu ni ufunguaji wa macho ili kuona hazina za kweli, na akili inashikilia utukufu wa ulimwengu ulio bora. Roho inautamani ukamilifu wa Kristo Yesu (Manuscript 59, 1906).

Yesu alikuwa ni mwalimu bora kabisa ulimwengu kupata kumjua. Aliwasilisha ukweli kwa kauli zilizo wazi, zenye nguvu na vielelezo Alivyotumia vilikuwa vya hali safi na ya juu zaidi. Hakuwahi kuchanganya alama na maumbo hafifu na maagizo Yake matakatiifu, au kutafuta kufanya kama watu wapendavyo au kuliridhisha daraja ambalo lingesikiliza ili tu kufurahishwa. Hakuuleta ukweli mtakatifu chini katika kiwango cha wajinga.... Maneno Yake yalikuwa safi zaidi na yaliyotukuka zaidi.... Hakuudhalilisha ukweli ili kumfikia mwanadamu katika hali yake ya kuanguka, na kushusha kiwango cha haki ili kukidhi udhalilishaji wake; bali Alijinyenyekeza, akawa mtii hata mauti, naam, mauti ya msalaba, ili apate kuiokoa jamii ambayo ilikuwa imekokotwa na dhambi. Halikuwa kusudi Lake kufutulia mbali sheria ya Mungu kwa kifo Chake, lakini badala yake kuonesha kutobadilika kwa madai yake matakatiifu. Ilikuwa ni kusudi Lake "kuitukuza sheria na kuiadhimisha," ili kila mtu anayepaswa kuutazama msalaba wa Kalwari pamoja na Mhanga wake aliyeinuliwa aone hoja isiyo na majibu ya ukweli kamili wa sheria....

Aliuokoa ukweli, ukweli wa milele, kutoka katika ushirika duni wa makosa, na kuiamuru ing'ae katika mng'ao wake wote na fahari ya mbinguni. Anauinua juu ukweli, ili kwamba kama nuru iweze kuangazia maadili ya giza ya ulimwengu.... Yesu alirejesha ukweli uliokuwa umetupwa nje, kwenye mpango Wake wa kifalme, na kuuweka pamoja na ukuu na hadhi yake ya kweli. Kristo mwenyewe ni ukweli na uzima (The Review and Herald. Agosti 6. 1895).